

# Die nasies: Deel 2



## SABBATMIDDAG

### Skrifverwysings vir hierdie week se studie:

*Génesis 2:9–17; Daniël 2:31–35; Jesaja 17:12, 13; Daniël 7:1–3; Romeine 3:10–19; Openbaring 12:15, 16; Openbaring 10:1–11.*

### Geheueteks: “Laat staan en weet dat Ek God is; Ek sal hoog wees onder die nasies, hoog op die aarde.” (*Psalm 46:11*).

**D**eur die eeue heen het sommige mense geredeneer dat God die Sondeval beplan het omdat Hy dit so wou laat gebeur, en dat dit sy bedoeling was dat die mens in sonde sou verval en daarna dood sou gaan, en so Hom, in die persoon van Jesus, na die kruis sou lei. Per slot van rekening, hoe sou Hy anders die diepte van sy liefde vir die mens so kragtig en duidelik kon toonstel soos om op die kruis vir hulle te sterf? Kortom, die gedagte is dat dit vir God nodig was om die mens tot 'n val te bring.

Dit is 'n aaklige en veragtelike aanname om te maak. Dit was nog nooit God se bedoeling dat of Satan of die mens in sonde sou verval nie. Die opstand van Satan en daarna die val van die mens, was 'n tragedie met onmeetlike gevolge, en ons vreugde in Hom sou volmaak gebly het as ons eerste ouers nie in sonde verval het nie.

In hierdie week se les sal ons voortgaan om na die probleme te kyk wat deur die sondeval veroorsaak was, en wat na 'n begeerte vir menslike leierskap gelei het in teenstelling met God se leierskap. Hierdie waarhede word kragtig in die boek van Daniël onthul waar ons sien hoe dat God reg was toe Hy sy volk gewaarsku het teen wat sou gebeur het wanneer hulle van Hom sou wegdraai en liever aardse konings sou kies. Dit is presies wat hulle gekry het: aardse konings, en sondaars wat oor sondaars baasspeel — nog nooit was dit 'n goeie kombinasie nie.

*\*Bestudeer hierdie week se les ter voorbereiding vir Sabbat, 3 Mei.*

## Die heel eerste gebod

Die Tuin van Eden was 'n klaskamer vir God se eerste skepsele, 'n plek waar hulle interaksie met die skepping hulle oneindig meer van hulle Skepper sou leer. Ellen G. White het aangedui: “Die onskuldige egpaar was nie net kinders onder die vaderlike sorg van God nie, maar hulle was ook leerlinge wat van 'n alwyse Skepper onderrig ontvang het. . . . Die verborgenhede van die sigbare heelal - ‘die wonders van die Volmaakte in kennis’ (Job 37:16) — was vir hulle 'n onuitputlike bron van lering en genot.” — *Patriarge en Profete*, bl. 50-51.

**Lees** Génesis 2:9–17. Wat was die eerste gebod, 'n verbod wat God aan die mens gegee het, en waarom was dit so belangrik?

---

Die eerste keer wat die stamwoord van die werkwoord *tsw*h (om te beveel) in die Bybel gebruik word, word in Génesis 2:16 gevind waar God die mens beveel om nie van die boom van kennis van goed en kwaad te eet nie. Hoe kan sommige kennis verbied word? Is dit dan nie altyd handig om iets te ondervind en om meer te weet nie?

Nie volgens die Skrif nie: God se doel was om sy volk deeglik te onderrig om sodoende hulle 'n langdurige lyding te spaar wat deur sekere kennis veroorsaak kon word as die mens sou kies om self te regeer i.p.v. om deur die HERE regeer te word, wat dan ook toe later gebeur het.

Euue later, toe Israel vir 'n koning gevra het, het die HERE die gevolge vir hulle genoem (soos wat ons verlede week ontdek het), en het Hy sy volk in kennis gestel dat die besluit om weg te draai van sy direkte leiding, tot die einde van tyd sou duur.

Soos wat die konings van Israel meer en meer boos geword het, en God se verbondsvolk meer wêrelds geraak het en so van hulle oorspronklike doel verwyderd geraak het, het Hy selfs aan hulle meer gegee as wat hulle wou gehad het: 'n regering wat deur mense beheer word.

Deur die boek Daniël teen hierdie agtergrond te benader, kan baie insiggewend wees: die gang van koninkryke wat in die boek uitgebeeld word is nie net 'n aanklag teen “die nasies” – die heidene – nie, dit is ook 'n aanklag teen Israel se mislukkings, hulle weiering om God se *mitswot* (gebooie) te gehoorsaam. Eeue van onderwerping i.p.v. die vryheid wat aanvanklik in Eden gegee was, sou 'n nuwe klaskamer word waar gewillige harte die opvallende kontras tussen die koninkryke van hierdie wêreld en God se koninkryk kon waarneem.

**Dink na oor die tipe kennis, selfs vandag ook, wat vir ons beter sal wees om nie van bewus te wees nie. Hoe help dit ons om te verstaan wat in Eden verbied was?**

---

## Daniël 2

Dit was gedurende die Babiloniese ballingskap wat God deur die profeet Daniël die mees onweerlegbare beskrywings van die verhouding tussen sy volk en die koninkryke van die wêreld gegee het. Sy volk was nie meer selfregerend nie; hulle sou nou die gevolge van hulle keuses oes. (En, dalk, daaruit leer?)

**Lees Daniël 2:31–35, wat 'n uitgebreide panoramiese blik op die wêreld se geskiedenis tot en met die einde van tyd, gee. Watter belangrike waarhede kan ons uit hierdie verbasende profesie leer?**

Aan die einde van die negentiende eeu het baie mense 'n nuwe vertroue in die mens se vordering begin toon. Die Parys Uitstalling (1900), byvoorbeeld, was 'n merkwaardige vertoning van optimisme oor die toekoms. Met al ons tegnologiese en wetenskaplike vordering sou baie van die mens se ergste probleme sekerlik tot 'n einde kom! Toe die mens die twintigste eeu binnegaan, was daar baie van die denkers wat met groot optimisme gevul dat die Verligte ideale — soos die mens se vatbaarheid vir verbetering en die mag van die rede — 'n wonderlike nuwe era vir die mensdom sou inlui.

Wêreld Oorlog I het egter baie gou daardie drome verydel, en teen die einde van die twintigste eeu het ons meer as 200 miljoen mense deur oorlogvoering verloor. Ons mag miskien tegnologies gevorder het, maar sekerlik nie moreel nie. Om Dr. Martin Luther King jr. aan te haal, ons het goedgerigte missiele gehad, maar misleide manne. En *dit* is 'n baie vreesaanjaende kombinasie.

Baie profesie-studente het opgelet dat die metale in Daniël 2 vorder van baie waardevol na minder waardevol: goud se waarde verminder na silwer, silwer verminder na koper, en koper na yster, totdat net yster en klei oorbly.

Charles Darwin, Karl Marx, en ander negentiende eeuse denkers het probeer om ons te oorreed dat die mens besig is om op een of ander manier opwaarts te beweeg — dat ons biologies en sosiaal besig is om te ontwikkel. En hoewel die mens se bestaan in sekere opsigte verbeter het (ten minste op 'n fisies vlak), wie kyk na die toekoms van hierdie wêreld soos dit nou regeer en bestuur word met baie optimisme oor vrede, sekuriteit en voorspoed?

**Jesus het gewaarsku, “En julle sal hoor van oorloë en gerugte van oorloë. . . Want die een nasie sal teen die ander opstaan en die een koninkryk teen die ander; en daar sal hongersnode wees en pessiëktes en aardbewings op verskillende plekke” (Matthéüs 24:6, 7). Ten spyte van hierdie waarskuwings, hoe kan ons deur ons kennis dat ons vooraf hiervoor gewaarsku was, bemoedig word?**

## Daniël 7

Die droom van Daniël 2 was eerste aan 'n Babiloniese koning getoon. In teenstelling hiermee was die visioen van Daniël 7 aan 'n Hebreeuse profeet, 'n lid van God se verbondsvolk, getoon.

Dieselfde onderwerp wat Nebukadnésar ontvang het, was aan Daniël getoon, maar vanuit 'n ander perspektief. In plaas van 'n beeld, het Daniël opeenvolgende nasies uit die see sien verskyn as gevolg van 'n wind wat die water geroer het. Hierdie nasies was voortdurend in 'n stryd gewikkel wat veroorsaak het dat daar gedurig 'n magsverskuiwing plaasgevind het. Verse soos Psalm 65:6-9; Jesaja 17:12,13 en Jeremia 46:7, 8 gebruik die ooreenkoms tussen die gedruis van vloedwaters en omstuimige branders, om die oproer tussen nasies uit te beeld.

In teenstelling hiermee was die Beloofde Land soos 'n eiland vol vrede en veiligheid te midde van die see van Heidense koninkryke — 'n heilige nasie wat op die vaste fondament van God se regering gegrond was teenoor die onregeerbare nasies rondom hulle.

**Lees Daniël 7:1–3. Daar is baie beweging in hierdie toneel. Watter lesse kan ons uit hierdie uitbeelding neem soos bv. die dier wat eerste uit die see opkom?**

---

Daniël kyk vanaf die kus na die chaos van Heidense oorlogsvoering en sien hoe die diere skielik uit die water *na die land opkom* — in sy gebied in! Heidense probleme het nou sy volk se probleme geword. Sy volk het gekies om soos Heidene te leef, so nou moet hulle saam met en onder die beheer van die Heidene leef. Deur met Babiloniese oorheersing te begin, het God se verbondsvolk nooit weer langdurige selfstandigheid geniet nie.

Hierdie verlies sal so bly vir God se volk tot die einde van tyd wanneer Christus sy regmatige plek as ons Koning finaal sal inneem. In die Nuwe Testament het God se volk aangehou om onder die heerskappy van die Romeinse Ryk te ly en daarna onder die vervolginge van die klein horing, die opvolger van Heidense Rome.

Hoewel, volgens die geskiedenis, sommige nasies beter was as ander, en party tydperke meer vreedsaam as ander verloop het, het die oorgrote meerderheid van die nasies, volkere en koninkryke in die geskiedenis van een tragedie na 'n ander beweeg, van een verdrukker na 'n ander. En dikwels was dit alles gedoen onder heersers wat daarop aanspraak gemaak het dat hulle net die beste bedoelinge vir hulle eie mense nagestreef het. Wat 'n kontras was die heerskappy wat God vir sy volk in gedagte gehad het nie, as hulle dit maar net sou verkies het.

**Hoe help Romeine 3:10–19 om so baie van ons wêreld te beskryf? Hoe toon vers 19 veral hoe ons die evangelie so broodnodig in ons lewens het?**

## Tussen land en see

Die land en see uitbeelding in die Bybel kan, veral wat profesie betref, baie leersaam wees. Dink aan die gebruik van die simbole *land* en *see* in Bybelprofesie, wat 'n skerp kontras vorm.

“Symbolies, wanneer aarde en see naasmekaar geplaas word, verteenwoordig aarde dikwels die geordende wêreld, of selfs die land van Israel, terwyl see na die Heidense nasies verwys wat die land bedreig het soos wat die see 'n bedreiging vir die land is.” — Beatrice S. Neall, “Sealed Saints and the Tribulation,” in *Symposium on Revelation*, Boek 1, red. Frank B. Holbrook, (Silver Spring, MD: Biblical Research Institute, General Conference of Seventh-day Adventists, 1992), bl. 260, (vry vertaal).

Volgens hierdie mening is die land 'n plek van stabiliteit, gegrond op die regering van God; die see verteenwoordig die onstabiele onrustigheid van die nasies wat op menslike hoogmoed gegrond is.

**Met bogenoemde gedagtes as agtergrond, lees Openbaring 12:15, 16 en Openbaring 13:1, 11. Let op na die naasmekaarstelling van water en aarde. Hoe word dit gebruik, en wat kan dit ons leer oor hoe om die profetiese Woord te verstaan?**

---

---

---

Let op dat die draak *water* gebruik om die vrou (die kerk) te vervolg. Soos ons gesien het, word water dikwels gebruik om die wêreld se regerings te simboliseer en ook die onrus en chaos wat daarmee saamgaan. Daarom kan ons sien hoe Satan in staat was om die massas wat deur hulle leiers aangepor was, te gebruik om God se volk dwarsdeur die kerk se geskiedenis te vervolg.

Ook verstaan Sewendedag-Adventiste dat Openbaring 12:16 na die vervolgte gelowiges se verhuising na die Nuwe Wêreld verwys. Indien ons begrip van land en see korrek is, wat sê dit oor die totstandkoming van die Amerikaanse Republiek?

Kan ons dit sien as “die aarde” soos die “Beloofde Land” 'n plek was wat spesiaal vir God se volk afgesonder was? Kan dit die rede wees waarom die landdier eers “soos 'n lam” verskyn? Hoewel Amerika nog nooit die “Nuwe Israel” was soos die eerste stigters dit graag wou sien nie, was dit vir 'n lang tyd 'n *land* van godsdiensvryheid vir miljoene van die wêreld se godsdiensverdruktes.

Ongelukkig sal hierdie dier wat soos 'n lam optree eendag “soos 'n draak” begin praat (*Openbaring 13:11*). Die Verenigde State wat so lank 'n baken van godsdiensvryheid vir die vervolgte was, sal die dominante godsdienstige vervolger word! Hierdie is nog 'n voorbeeld van wat gebeur het toe die mens gekies het om homself te regeer in plaas van om deur God regeer te word.

## Profeteer weer

Die oorblyfselkerk het in die Nuwe Wêreld ontstaan, presies daar waar godsdiensvryheidsoekers heen gevlug het gedurende die sewentiende en agttiende eeue. Gegewe die langdurige godsdienstige en politieke struikelblokke op ander plekke, is dit te betwyfel dat die begin van hierdie beweging so vinnig of kragtig op 'n ander plek sou kon ontstaan het soos wat dit in die nuwe land wat die Verenigde State geword het, gebeur het.

**Lees** Openbaring 10:1–11 wat die geboorte van die nuwe beweging beskryf. Let op na sommige van die simbole wat ons bestudeer het, soos “die nasies”, die land en die see. Deur versigtig te lees om te voorkom dat jy nie te veel in die skrifgedeelte inlees nie, watter potensiele insigte kan jy hier vind?

Die engel roep met 'n groot stem, baie soos die drie engele van Openbaring 14 en die engel van Openbaring 18. Hierdie is 'n dringende oomblik in die geskiedenis om die werk van die oorblyfselkerk tot stand te bring ten behoeve van “baie volke en nasies en tale en konings” (*Openbaring 10:11*).

Die engel hou 'n “geopende boekie” in sy hand — waarskynlik die boek van Daniël (*lees Daniël 12:4*) — wat vir die eerste keer na baie geslagte oopgemaak word. Hy het een voet op die see en die ander voet op die aarde. Dit kan verwys na die gedagte dat die boodskap vir hele aarde bedoel is, beide die Ou Wêreld en die Nuwe. Dit kan ook verwys na die gedagte dat hierdie boodskap vir *alle* nasies bedoel is: vir hulle wat op die land en vir hulle wat in die “heidense” see woon.

Die hele wêreld sal uiteindelik met die heerlikheid van God verlig word, en die finale boodskappe van Openbaring 14 sal aan almal verkondig word. Net soos vir Israel, is die mandaat vir ons kerk om die evangelie te verkondig “in die hele wêreld tot 'n getuienis vir al die nasies, en dan sal die einde kom” (*Matthéüs 24:14*).

God is besig om die mens se geskiedenis tot 'n glorieryke einde te bring: die einde van menslike koninkryke en die permanente troonbestyging van Christus. Lees Daniël 2:34, 35, 44 en 45. Die Bybel maak dit sonder enige dubbelsinnigheid baie duidelik dat al hierdie wêreldse koninkryke uitgeroei sal word, sonder enige spoor van hulle en hulle aaklige nalatenskap, en wat vervang sal word deur God se ewige koninkryk waar sonde, lyding, siekte, kwaad en die dood, nooit weer sal bestaan nie.

**Kyk hoe akkuraat die profesieë van Daniël 2 en 7 die opkoms en val van al hierdie wêreldkoninkryke voorspel het. Waarom behoort sulke akkuraatheid, wat absoluut verbasend is as jy daaraan dink wanneer die boek Daniël geskryf was, ons te help om Hom te vertrou vir sy belofte van 'n laaste en ewige koninkryk — God s'n?**

**Vir verdere studie:** Lees Ellen G. White, “Die Toring van Babel,” bl. 117–124, in *Patriarge en Profete*.

“ ‘Ek het ’n nuwe hemel en ’n nuwe aarde gesien, want die eerste hemel en die eerste aarde het verbygegaan’, Openbaring 21:1. Die vuur wat die goddelose verdelg, reinig die aarde. Elke spoor van die vloek word uitgewis. Daar sal nie ’n ewigbrandende hel wees om die verlostes gedurig te herinner aan die vreeslike gevolge van die sonde nie.

“Daar sal net een herinnering aan die sonde wees: ons Verlosser sal altyd die tekens van Sy kruisiging dra. Op Sy hoof, aan Sy sy en aan Sy hande en voete is die tekens van die wrede werk van die sonde. Waar die profeet Christus in Sy heerlikheid aanskou, sê hy, ‘Glans soos sonlig is dáár, ligstrale aan sy sy, en daar is die omhulsel van sy krag’ (Hábakuk 1:4). Die deursteeke sy waaruit die rooi stroom gevloei het wat die mens met God versoen het – daar is die Heiland se heerlikheid, ‘daar is die omhulsel van sy krag’. Magtig om te red deur die offer van verlossing, daarom was Hy sterk om diegene te oordeel wat Gods genade verag het. En die tekens van Sy vernedering is die tekens van Sy hoogste eer; deur die ewigheid heen sal die wonde van Gólgota Sy lof en Sy mag verkondig.” — Ellen G. White, *Die Groot Stryd*, bl.674.

## Vrae vir bespreking:

- ① Aan die einde sal alle aardse prestasies, maak nie saak hoe verhewe of hoe groot, hoe vreesaanjaend en glorieryk dit was nie, tot stof terugkeer, tot as verbrand, en uiteindelik vir ewig verdwyn. Dit sluit ook in watter groot en glorieryke aardse dinge jy vermag het of besig is om nou te vermag. Waarom is dit altyd belangrik om hierdie perspektief in gedagte hou? Hoe behoort hierdie perspektief jou te help om jou prioriteite reg te hou?
- ② Let versigtig op die seedier van Openbaring 13:1–10. Op watter maniere is hierdie dier die vanselfsprekende gevolg van die gedagtegang van Babel? Dit is duidelik die somtotaal van *alle* menslike “nasies”, vanaf Babilon dwarsdeur tot die klein horingmag. Watter kenmerke van elke koninkryk wat regdeur die tye bly voortbestaan het, het jy raakgesien? Op watter maniere weerspieël die wêreld nog die waardes van byvoorbeeld Babilon of Rome?
- ③ Hoe behou ons as Adventiste die regte balans tussen ons toewyding aan die HERE en ons gehoorsaamheid aan die wette van watter nasie of regering ons ook al aan behoort? Wat gebeur wanneer gehoorsaamheid aan die een tot ongehoorsaamheid aan die ander een lei?